

COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

1 ¹Janiyari Pabloni. Janiyari nio naajiya Tesalónica tiacajinia quiniaa Pueyaso pueya maanuucuarani. Niaacujaari pa Que Pueyaso rupuejaca, pa Jiyaniijia Jesucristo rupuejacanío. Canaari mariyata nia saruhuataani, Silvano, Timoteonio. Pueyaso cuaara maninia jiitiaara na cumaacata niajaniya, maninia nia quiniuria. Cuaara nioojia cajitiirijahuaj, juhuajaniya nia quiniuria.

**Tesalónica pueyanaari Jesuucua tiuujiaca
quiquiaari seetanujanaa**

²Maninia nia quiniuucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuuquiaani. ³Pa Que Pueyaso canaa secojosacari, canaari pueyaracaanu niishiquiaa niajaniyani, taa pueyaracaanu nia poonijioquiaa Pueyasorani, Neyanuucua nia tiuuniuucua. Canaari niishiquiaajuhuaj taa nia paniniutia nia naacuquiaa niarta pueyani. Naajuhuaj, niaari maninia rejeretaquiaa taraatia nia miiniu, nia niishiniuucua pa Jiyaniijia Jesucristoori pocua niniutianihua.

⁴Pueyaso panishano pueyanaa, canaacujaari niishiyani, nojuajaari nia saquiriojoquiaari na panishano muerasu nia quiniuria. ⁵Canaa jaara nia niquiara

pohuataquiaari Pueyaso rupaa Jesucristojinijini, cunoori maja najuhuana pohuatasano quiquiaari. Canaa pohuatasanoori jiyanhua Pueyaso cumaacaraca quiquiaari. Pueyaso Sohuanuuri jiyanhua poonijioriquiaa nioojiacajinia. Naacujitij, niaari niishiquiaari canaa pohuatasanoori seetanu rupaajanaa. Niaacujaari niishiya taa quijiaa canaa quiquiaari canaa quishacari niaatani, maninia Pueyaso muerasu nia quiniuria.

⁶Niaari canaacua jiaatiaquiaari, juhua canaa nia quiniurijahuaj, juhua pa Jiyaniijia Jesu nia quiniurijahuaj. Niaari seetanujanaa naa miijiacara quiquiaari, Pueyaso tojjijia nia quiniurijahuaj taa canaacuaani. Pueyaso rupaa nia tojjishacari, niaari jiyanhua na timitiaquiaari. Cunora, niaari jiyanhua naquiya miishaaquiaari. Naajaa, Pueyaso Sohuanuuri nia cumaquiquiaari saaja, shuquiriaatia nia quiniuria. ⁷Naa shuquiriaatia Pueyaso tojjijia nia quiniuucuatej, niaari niarta Pueyaso pueya shiniujuquiaari, seetanujanaa Pueyaso tojjijia nojori quiniurijahuaj. Niaari naa shiniujuquiaari puetunu niarta Pueyaso pueyajanaa Macedonia jiyajinia quiniaatej, Acaya jiyajinia quiniaanio. ⁸Pa Jiyaniijia rupaari niajaniyajiniji tucuaaanu paaquequiaari, maja saaja Macedonia jiyajinia, Acaya jiyajinianío. Cuno rupaari puetunu tiqiyocujanaa poojotasaquiaari.

Naacuaajitij, puetunu tiquiyocua quijiaca pueyajanaari tari niishiya taa Pueyasocua tiuujiaca nia quiya seetanujuanaani. Naacuaajitij, ¿canaatucua casaara niishitiojore Jesujiniji socuani, tee cuniqui pueya niishiya tari nojuajinijicua-jani? ⁹Tee cuniqui canaa tiuquiquiaani, pueyari canaajiniji poojotanuya tari, taa Jesujiniji canaa pahuataquiaaricua niajaniani. Nojoriiri niishiyajuhua taa canaa nia tiuquinitiaquiaari maninia nia tiacajiniaqueyani, canaa pahuatasano nia tojinuria. Naajuhua, niaanaari pueya shipinijiosano nia jiyatesano nia pueyasora cartequiaari, pueyaracaanu rishijia seetanu Pueyasojuanaa tojitiajaca nia quiniuria. ¹⁰Naajuhua, niaanaari Neyanu sashiya, jiyocuaaanu na tiuquiniuhua-ra, teyano Pueyaso samiitiani quiaariuhua macujinijicua jani. Pueyari niajanijajiniji niishiyajaacuhua, Jesuuri pocuaji Tacuna, maja mani quiquiojinia pa quejoosaanura, Pueyaso saniitosacari na tojitiaashijia.

Pablo niishitosacariuhua pueya, taa na quiquiaari nojoritiani

2 ¹Cuarta Pueyaso pueyanaa, niaacua-jaari niishiya, majaari najuhua canaa quiniu quiquiaari, niaata canaa quishacari. ²Niaacuaajaari niishiya, Filipo tiacajinia canaa quishacari, niaacua canaa tiuquiyaquishacarijia, canaari cuno tiacajinia sesacasaaquiarini. Canaari jiyano hua taaatia miishaaquiarinijuhua. Naajuhua, nia tiacajinia canaa tiuquijio-sacari, pueyari canaa pahuatasano ruuretaquiaari saaja. Naajaa, Pueyasoori canaa cumaquiquiaari juhua jiuujiaaju canaa pahuatanura Jesucristojiniji nia niquiarajuhua. ³Canaacuaajaari niishiquiaarini canaa pahuatasanoori seetanu rupaajanaa. Majaari canaa pahuatanu quiquiaari canaa miiniuria sesa niajanija, canaa sapojonura

niajanijajuhua. ⁴Pueyasojuanaari canaacua tiuquiaari. Cunora, canaa jiyatequiaariiri Neyanujiniji pahuatanaa canaa quiniuria. Naacuaajaari taa canaa poojotaquiaa pueya tiuuniuria nocuacua-jani, Pueyaso jiyanooniuria nojori. Canaari seetanujuanaa Pueyaso timitiniu paniani, maja saaja pueya. Pueyasocua-jaari canaa jiuujia niishijia. ⁵Niaacuaajaari niishiyajuhua, majaari canaa sapojonu quiquiaari niajanija shanohua canaa sequesano, canaa nia maniniucuanura. Naajuhua, majaari canaa cuaracashijionu quiquiaari niajanija, canaa nia niquitioj-nura nia cumaneecajiniji. Pueyasoori na niishiyacuaaja. ⁶Majaari quenaaja canaa niishiriojonu quijia pueya timitiasano canaa quiniuria, nia timitiasano pueya canaa quiniurajuhua. Maja. ⁷Canaacua-jaari seetanujuanaa nia jiyaniijianucuanu, Jesucristo jiyaramiquishano pueya canaa quiniucua. Naajaa, niaata canaa quishacari, majaari naa canaa miiniu quiquiaari niajanija, juhua canaa seya nia quiniuria. Saniniuujia, canaari tojetaaru-cuajanaa juhua naatujoori quiquiaarini, niaata canaa quishacari. Naatej, taa maaji jiiitia maninia necohuacuaani, canaari naa nia jiiitiaquiarinijuhua. ⁸Jiyano hua canaa paniniucua niajanija, majaari saaja Pueyaso rupaa canaa pahuatanu quiquiaari niajanija. Canaa cutaraari tama canaa cuaqueyajaaja panitiaquiaari niaacuarani, naajaa, canaa cuaara puecoosaariaqui. Canaari naa jiiitiaquiaari niajaniani, jiyano hua canaa paniniucua niajanija. ⁹Cuarta Pueyaso pueyanaa, niaacuaajaari niishiya taa canaa poonijio-quiaari jiyano huanu, tama canaa panishanojuaja canaa masetajara. Canaari naa poonijionuquiarini juuca, niucuanu, canaa pahuatanura Pueyaso rupaa niajanija. Canaari naa miiquiaarini maja canaa taajetenura niajanija canaa mashiniquijionuta nia cumaneeca.

¹⁰Naacuaajitij cuarta Pueyaso pueyanaa, niajaniya, Pueyasojuhuaj, niaacuajaari niishiya canaari saaja maninia miiquiaa-rini, niaata canaa quishacari. Majaari quenaaja canaa miiniu quiquiaari sesa. Naacuaajitij, tamasaacari maja na naata canaacuara saquirojotanu, canaa jaara tojetaarucujanaa sesa miyaquiquiaarini. ¹¹Niaari niishiyajuhuaaj taa canaa shiniujiuquiaari niajaniani Pueyaso nia tojinuria. Niaari niishiyajuhuaaj taa canaa cumanjiaquiaari puetunu niajanijajanaa-ni taraatia nia quishacari, naatej, taa pueyano miiquiaa na panishano niquiohuacuaani. ¹²Naajuhuaaj, canaacua-jaari jiyanoahua nia nacasuquiaarini maninia mijiaca nia quiniuria juhua seetanujanaa Pueyaso pueya. Pueyaso-cuajaari nia saquirojoquiaari pueyaracaanu nata nia quiniuria, jiyaniijianucua nia quiniuriajuhuaj, juhua nojuajuhuaaj. Nojuacuajaari na shacantuuca cumaacajinia quijia.

¹³Canaa jaara Pueyaso rupaa pohuata-quiaari nia niquiarani, majaari nia jiyaniinu quiquiaari cunoori saaja pueyajiniji canaa tojinuuashano. Maja. Niaari seetanujanaa na tojitiajacara quiquiaari, nia niishishacari cunoori seetanujanaa Pueyaso rupaa cutara. Canaari cunora canaa timiniutia sequequiaa Pueyasoni, "paacarasho". Canaa pohuatasanoori seetanujanaa Pueyaso rupaa. Naacuaajitij, na rupaari nioojiajinia poonijioquiaa, maninia mijiacara na jataniniuria niajaniya, Jesucuaa tiuujia nia quiniucua. ¹⁴Naa Jesucristoocua tiuujia nia quiniucua-tej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaaricuaani. Tama narta Judiocuacajarija nojori miiquiaari naquiya, Jesucristo tojijia nojori quiniucua. ¹⁵Nio cuarta Judiocuacani, nojori supuetanaajuhuaaj, nojoricuajaari

pa Jiyaniijia Jesucristo motuquiaari. Nojori supuetanaari naa tariucuaacaanu puecoquiaarijuhua Pueyaso sequesano caminiujiunaa pueyatej. Naajuhuaaj, Jesucuaa tiuyashijia cuarta Judiocua-caari canaa taanuquiaari canaa Judea jiyajiniji. ¿Cuno pojoritiiri Pueyaso timitiasano? ¡Maja! Cuno pojoricuajaari juhua puetunu mijiria quiniaa paraaja-naa. ¹⁶Naacuaajitij, canaa jaara taucuaa pohuatanu paniriquia Jesucristojinijini, Pueyaso pueyara nojori jiyatesaanuraju-huaaj, Judiocuacaari canaa tenujuquiaa juucua. Naacuaajitij, Pueyasora, sesa Judiocuaca mijiosanoori tari tojetaaru-cujanaa puera. Cunora, Pueyasoori nojori saniitioquiaa jiyanoahua.

Pablo naquerejosacari juucua Tesalónica tiacajinia quiniaa Pueyaso pueyacua

¹⁷Cua panishano pueyanaa, canaacua-jaari rupaquijia nia shuriucuaaji quiaquiaarihuani. Jiyacari canaa niquiquishacari niajaniya, naajaa, canaacuajaari juhua niaata quiquiaajaani, pueyaracaanu canaa niishiriojosacari niajaniya, niaacuara canaa secojosacari. Canaari juucua jiyanoahua nia niquiniu paniriquiaani. ¹⁸Cunora, canaari niaacua naquerejoquiaari juucua. Janiyari niaacua naquerejonu pacutejoquiaarini. Satanásri canaa cushitioquiaari saajani. ¹⁹¿Janiyatucua casaara nia niquiniu paniyaquiririni? Niaacuajaari jiyanoahua cua timitiasano pueya. Pa Jiyaniijia Jesucristo tiuquishacarihuua, janiyari niishiyani, nojuajaari canaa shuquiritia-nutaniya maninia na tojijia nia quishacari canaa niishitiojonuucua na rupaa niajaniya. Pa Jiyaniijia pa quishacari, jiyacaritij, canaari jiyanoahua nia timitianutaniyani, maninia na tojitia nia quiniucua mijiria. ²⁰Taaquiririni, canaacuajaari tari shuquiriaatia quiyani, maninia na

tojitiajaca nia quiniuucua. Niaacuaajaari seetanujuanaa canaa timitiasano pueya.

3 ¹Naa jiyanoehua canaa niishiniu panishacari juucua nijaniyajinijitij, majaari socua canaa sashiniu paniniu quiriquiaa. Cunora, canaari niishiriojoquiaarini, maniniacuajaari canaa jateenura tamajaaja Atenas tiacajinia.

²Naacuaajitij, canaari saaja parta Pueyaso pueyano Timoteo jiyaroquiaari niaacuani. Nojuacuajaari jaarajaaja cuata poonijiona Pueyasora, Jesucristojiniji canaa pohuatanura. Janyari niaacua na jiyaroquiaarini na cumaquiniuria nijaniya, mariyata socua na shiniujiu-niuria nijaniya Jesuucua nia tiuuniuria saaja. ³Na jiyaroquiaarinijia na cumaquiniuria nijaniya maja quenaaja niquiriyatu nijaniyajinijinio pishiniuria Pueyasocuaji, naquiya nia miishacari. Niaacuajaari tari niishiquiaari, paari naquiya miishiyani Jesucristoocua pa tiuuniuucua. ⁴Canaa quishacari niaataja, canaacuaajaari tari nia numootequiaarini, puetunu pajaniyajanaari naquiya miishaanutaniyani Jesucristo tojitiajaca pa quiniuucua. Niaacuajaari niishiya, seetanujuanaa naa tohuateecanuuri cua sequesano. ⁵Cua niishishacari nijaniyajiniji, niaanaari naquiya miishaaquiaa, janyari puereriquiaani Sesaaca naasucua nia miitiriucuaa sesa. Jaara naa quiriritij, puetunu canaa miishanojuanaa niaara maara najuhuana quiquianu. Naa cua tacaashacaritij, majaari socua cua tarishiniu paniniu quiquianu, nijaniyajiniji cua niishiniuria. Cunora, janyari ritia jiyarocanu niaacua Timoteoni, saniniuujia nojuaja pohuatanuhuaa janiya, niaate Jesuucua tiuyajaa.

⁶Timoteocuaajaari tari nijaniyajiniji tiuquiriohuacuaa. Nojuajaari canaa pohuatasuhuacuaa, niaanaari Jesuucua tiuyajaa. Niaanaari panitiojuaca quiyajaa. Canaa pohuatasuhuacuaajaari-

huaj, niaanaari canaa niishiriojoquiaa jiyanoehua nia paniniutia canaa. Niaanaari canaa niquiniuucua jiaatiaa, naatej, taa canaa jiaatiaa canaa niquiniuria nijaniyacuaani. ⁷Cuarta Pueyaso pueyanaa, seetanujuanaa canaari taraatia miishiya niyani. Canaari tacayajuhuaaj. Naajaa, canaa niishishacari niaanaari seetanujuanaa Jesuucua tiuyajaa, canaari canaa jiuujia cajitiriucuaani. ⁸Naa canaa tojishacari niaacuajitij, canaari juhua samiitiacorohuani, pa Jiyaniijia tojitiajaca nia quiniuucuaaja. ⁹Cunora, canaari jiyanoehua nia shuquiritiaa Pueyaso niquiarani. Naacuajitij, majaari canaa niishiniu taate canaa naata sequenu nojuajani "paacarasho". Naa maninia nia quiniuucuatej, canaari jiyanoehua shuquiriaatia quiyani. ¹⁰Naajuhuaaj, canaari juuca, niucua secojoquiaa Pueyasoni, nojuaja cuaara canaa tiuquiti-huara niaacua. Canaari maninia nia niishitiojonu tucuatunu paniani, seetanujuanaa maninia jeenucuasano Pueyaso pueya nia quiniuria.

¹¹Canaari paniani pa Que Pueyasojuanaa, pa Jiyaniijia Jesucristonio, nojori cuaara canaa naacuura niaacua canaa tiuquiniuria. ¹²Pa Jiyaniijia cuaara nia jiyateera socua jiyanoehua panitiojuaca nia quiniuria, tamasaca panijia nia quiniurajuhuaaj, taa canaa pania nijaniyacuaani. ¹³Naa panijia na jiyatesacari nijaniyatej, niaari nioojia niquijioteyashijiaca quiniutianiya cutara. Naajuhuaaj, niaari tojetaarucujanaa sesa miyashijiaca quiniutianiya, pa Jiyaniijia Jesucristo tiuquishacarihuua puetunu na jiyanooshano pueyatajanaa.

Taate pa naata Pueyaso shuquiritiniuni

4 ¹Quiarijiani cuarta Pueyaso pueyanaa, pa Jiyaniijia Jesu jiyaramiquishano pueya canaa quiniuucua, canaa sequesano nia tojiri.

Quiarijiani, canaari nia shiniujiyani socua maninia miijiaca nia quiniuria. Canaari nia niishitiojoquiaari maninia miijiaca nia quiniuriani, Pueyaso nia shuquiritiniuria. Niaacuaajaari naa maninia miya.

²Niaacuaajaari canaa rootasano pa Jiyaniijia Jesujiniji niishiya tari. ³Canaa-cuaajaari nia rootaquiaarini, Pueyasoori nia panitiaa saaja nera nia quiniuria, tojetaarucujanaa maninia jeequesano nia quiniuria sesa nia miishanojiniji. Majaari nia numuetucunu nia camishoo maaji. ⁴Puetunu mashiquiorijianaa cuaara niishiiria maninia na cojuanura necocuarano, maja ritia na numuetucunura, nata na camiyaquishacarijia. Cuaara na cuaqueya panishano rejetenu niishiiria. ⁵Majaari sacuaraatia nia miiniu taa Pueyaso niishiyashijiaca pueya miiquiaacuaani, jiyanojua nojori jiaatiasacari maajicua. ⁶Naajuhuj, majaari quenaaja jiyasohuaja niarta pueyano niquiocua nia numuetucunu, neyaca nia sapojonuta. Cuno maajicuaajaari saa neyacaraja, maja tamonura socua. Pueyasocuaajaari naa miijiaca saniitionutaniya jiyanojua, taa canaa numootequiaari tari nijaniyacujani. ⁷Pueyasoori maja na saquiriojonu quiquiaari pajaniya sacuaraatia miijiaca pa quiniuria. Pa saquiriojoquiaariiri tojetaarucujanaa sesa miyashijiaca pa quiniuria, saa neraja. ⁸Naacuajitij, cante nio rootasano ruuretajani, nojuajaari maja saaja na rerequetenu nio rootasanojiniji pohuatana. Nojuajaari Pueyasojuanaa rerequeteya cutara, cante na Sohuanu niquitioquiaari nijaniyacujani.

⁹Quiarijiani cuarta Pueyaso pueyanaa, janiyara, najuhuanaruhua niaacuara cua naajionura cua niishitiniuria nijaniya, panitioojuaca nia quiniuria. Pueyasocuaajaari tari nioojiajinia nia niishitiquiaari panitioojuaca nia quiniuria. ¹⁰Niaacua-

jaari seetanujuanaa puetunu Macedonia jiyajinia niarta Pueyaso pueya panijiaca quiyacuaja. Naajaa, cuarta Pueyaso pueyanaa, canaa nia tojiri. iSocua panijiaca nia quiri! ¹¹Tama nia cuaqueyajaaja nia cumaquiriquia juhuajaniya quijiaca nia quiniuria. Tama nia poonijosanojiniajaaja nia cojeriquia, tama nia juaashiquiatajaaja nia poonijosacari, taa canaa rootaquiaari nijaniyacujani. ¹²Naacuajitij, Pueyaso niishiyashijiaca pueyari nia rerequeteyaquiniutianiya. Naajuhuj, niaari puetunu nia panishanojuanaa jiitianutaniya.

Taa pa Jiyaniijia tiuquishacariuhua quiniutianiya

¹³Cuarta Pueyaso pueyanaa, canaari juhuacarijia nia tonu paniyani taa Jesuucua tiuuijiaca shaajecono pueya miishaanutaniyani. Canaari nia niishitiniu paniyani maja nia taraajenura juhua Jesuucua tiuyashijiaca pueya. Nojoriiri maja na jiitianu nojori Jiyano, nojori na samiitianijionuhua. ¹⁴Paacuaajaari niishiyani Jesuuri cusoquiaari. Na nuhuaji samiitiaquiaariuhua. Naajuhuj, paari niishiyani, Pueyasoori Jesuucua tiuuijiaca shaajecono pueya samiitianijionutaniuhua, nojori na rijionura Jesuta, Jesu tiuquishacariuhua.

¹⁵Canaajanaacuaajaari nia sequeyani, niocuaajaari pa Jiyaniijia niishitishano canaa: pajaniya, canapute pa Jiyaniijia tiuquishacariuhua saminiucua quiniutianiyajaani, majaari macunucua pa puetanu quiniutianiya pa Jiyaniijia pa naacuneetoonura jiya cajiniocua. ¹⁶Naa quiniutianiyaari. Pa Jiyaniijia nacanuari tojishaanutaniya, Pueyaso seya jiyaniijia nicanujuhuj, Pueyaso trompeta jonenenunio. Jiyacaritij, pa Jiyaniijiajaanaari jiyocuaaanuji rosenutaniya cohuaja najacajiniara. Jiyacarijuhuj, puetunujuanaa Jesuucua tiuuijiaca

shaajecono pueyari samiitiaconutaniuhua coteenu. ¹⁷Na nuhuaji pajaniya, canapue-te saminiucua quiyajaani, paari nojoritia ritia rijiosaanutaniya cohuaja najacajiniarani. Paari tii coquetoounutaniya pa Jiyaniijiaa paratujiniani. Jiyacaritij, paari tari pueyaracaanu nata quijiacarano quiniutianiyani. ¹⁸Cua panishano pueyanaa, nio cua pohuatasanota nia cumanijiatooriquia.

5 ¹Majaruhua maninia cua naajionura niaacuara cua niishitiniuria nijaniya socua, taacari pa Jiyaniijia tiuquiniutianiuhanu. Niaacuajaari tari na niishiya, naajuhuaj, taate mijiria quiniutianiyani na tiuquiyaquishacarijia. ²Niaacuajaari maninia niishiya, pueya jiyaniushacari juhuanojuaja maja pa Jiyaniijia tiuquiniu quiniutianiuha, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejojua tiuquiquiaa niucua tiajiniaacocuaani, juhuajaniya tia camaru maquesacari. ³Naajuhuaj, quera pa Jiyaniijia tiuquishacariuhua, mijiria quiniaa pueyari naa sequejaca quiniutianiya: “Paacuaja maninia quiyani. Shaaquicuaja miaque-toojonu”. Canashiyaquiji jiyacari, Pueyaso saniitosacari na tojiyashijiacaari quiniutianiya. Naa quiniutianiyari taa maaji nooquiaa juhuacatecara canashiyaquiji na manajacuaani. Majaari quenaaja niquiriyatu curosaanu quiniutianiya saniitosoo. ⁴Niajaniya saniniujia cuarta Pueyaso pueyanaa, niaari maja juhua ninishiqui quijiaca, pa Jiyaniijia cariyatunura nijaniya. ⁵Puetunu nijaniyajanaacuajaari cuhuashiqui quijiaca. Pueyasojunaacuajaari nioojiaca cuhuataquiaari. Majaari tari juhua ninishiqui quijiaca pueya pa quiniu. ⁶Cunora, pa Jiyaniijia sashijaca pa quirij. Maja juhua tamasaaja, juhuajaniya quiquioyari. Nojoriiri juhua maquetiuya. Pajaniya saniniujia cuarta Pueyaso

pueyanaa, juhua sutejaca pa quirij, maninia niishiriojojuacajuhuaj. ⁷Maquetuuaacari niucua maquetuquiaa. Naajuhuaj, mashaasequenuuuaacari niucua mashaasequenuuquiaa. Naa mijiacaari Pueyaso tojiyashijiaca. Majaari na maniniucuanu cuhuashiqui. ⁸Pajaniya saniniujia, paari cuhuashiqui quijiaca cutarani. Naaratej, pueyaracaanu maninia niishiriojojuaca pa quirij. Romano pueya miaquetoosacari, nojoriiri turtuco cushiyonuujua, nocuaji na nujutajara cashi. Cumueeca casaa cushiyonuujajaa-riuhuaj, na naca na cojuatajara. Naajuhuaj, naa poojia pa cojuare, saaja Jesuucua pa tiuuniutia, seetanujanaa panijiaca pa quishacarijuhuaj. Seetanujanaa pa niishiri, Pueyasoori pa saquiriojoquiaari na muerasu pa quiniuria pueyaracaanura. Naacuajitij, pocua pa niishitiaja cojuareni, maja poojia pa niquijiotenura najuhuanaj. Naacuajitij, Sesaacaari maja na naata shocotanu quiniutianiya pajaniya. ⁹Pueyasoori maja na saquiriojonu quiquiaari pajaniya na saniitosocoriquiano. Pa saquiriojoquiaari cutaraari na jiyanooniuria pajaniya, na muerasu pa quiniuria, Neyanu Jesucristoocua tiuuijaca pa quishacari. ¹⁰Neyanucuaajaari pocuara cusoquiaari, nata rishijiaca pa quiniuria pueyaracaanu. Naacuajitij, naajaa, paa jaara cusoyareni, paa jaara saminio quiyajuhuaj, pa Jiyaniijia tiuquishacariuhua, puetunu nocua tiuuijacajanaari pueyaracaanu saminio quiniutianiya nata. ¹¹Naaratej, pueyaracaanu nia cumaquitiooriquia Pueyaso rupaata. Nia shiniujiutiooriquiajuhuaj, seetanujanaa pa Jiyaniijia tojiijiaca nia quiniuria, taa nia miiquiaacuaja tarini.

Socua Pablo rootasacari Pueyaso pueya

¹²Cuarta Pueyaso pueyanaa, canaa nia tojiri. Cuniqui nia jiitianaa tojiijiaca nia

quiri. Majaari nojori rerequetenu. Nojoriiri jiyanhua poonijioquiaa pa Jiyaniijiaara nojori niishitiojonura niajaniya, na nacasunura niajanijahuaj.¹³ Cunora, jiyanhua nojori nia paniri. Majaari na rerequetenu. Nojoriiri pa Jiyaniijiaara poonijioquiaa na cumaqui-niuria niajaniya. Maninia nia quiri pueyanaa. Majaari juayonuujutatu.

¹⁴Nio nia tojirijiuhua cuarta Pueyaso pueyanaa. Taajecori nia nacasure. Noojia niquijotejaca nia shiniujiuri, seetanujua-naa cumueeca Pueyaso pueya nojori quiniuria. Noo pojori nia cumaquiriquia-juhuaj, Satanás saniniujiushacari na cuaqueya miini panishano rejeretaashi-jiacatej. Majaari cuno pojori cartenu. Nia juaaniu nia rejeteriquia, maja quenaaja nia juaaniuria tamascata.

¹⁵Naajuhua, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miiriquia niajaniya. Saniniujia, pueyara-caanu maninia nia miitooriquia niarta Pueyaso pueyata. Naa nia miiriquia puetunu pueyajuhua.

¹⁶Pueyaracaanu nia shuquiririquia, Pueyaso pueya nia quiniucua. ¹⁷Naajuhua, pueyaracaanu nia secojoriqia Pueyaso. ¹⁸Niaa jaara maninia miishaare, niaa jaara sesa miishaarejuhuaj, naajaa, puetunu naa nia miishaanuucujanaa Pueyaso nia sequeriquia, “paacarasho”. Pueyasojuaacuaajaari naa paniya pa miiniuria, Jesucristo Sohuanu pa jiitianuucua poojiajinia. ¹⁹Majaari Pueyaso Sohuanu nia ruuretanu, nojuaja jaara nioojiajinia nia shiniujiya maninia

nia miiniuria. ²⁰Naajuhua, majaari nia soonu Pueyaso sequesano caminiujiuniaa pohuatasano. ²¹Coteenu nia saniniujiuri cutara, nia niishiniuria seetanutejanaa nojori pohuatasano. Teyano nojori pohuatasanojinijiniote maniniani, cuno tojijiaca nia quiri. ²²Puetunu sesa niishishano casaajanaa soojeaca nia quiri.

²³Poojia cajitina Pueyasojuaanaa cuaara nia jeenucuaara juhuacarija, tojetaaru-cujanaa sesa miyashijiaca nia quiniuria pa Jiyaniijiaacuaji. Nojuaja cuaara naa cojuara nia sohuanu, nioojia, nia cuaqueyano, tojetaarucujanaa soosoo nia quiniuria pa Jiyaniijia Jesucristo cuaara tiuquiriohuaatijia. ²⁴Cante nia saquiriojoquiaaricuaa na pueya nia quiniuriani, nojuajaari puetunu shusha cua sequesanojuanaa niajaniya miiniutia-niya niaara. Nojuajaari maja na niishiniu na rupaa jatanu. Nojuaja cutaraari na sequesano miiija pueyaracaanu.

Pablo sequesano na naajionee na tucuatascari

²⁵Cuarta Pueyaso pueyanaa, Pueyaso nia secojonuuriqia canaacuarajuhua.

²⁶Canaara nia saruhuatate cuniqui quiniaa parta Pueyaso pueyajuhua nojori nia nujuunuta, seetanujuaana Pueyaso paniniutia.

²⁷Pa Jiyaniijia jiyaramiquishano cua quiniucua, cua tojitiare pueyanaa. Nio cua naajionee nia serojore puetunu Pueyaso pueyarajanaa.

²⁸Pa Jiyaniijia Jesucristo cuaara cumaquiiria nioojia. Cuaara naa quiiriatej.